

TATA PANGIBADAH MINGGU TRANSFIGURASI - GKJ AMBARRUKMA

15 FEBRUARI 2026

Gedung Induk Papringan, jam 08.00 WIB

(Warni Liturgis: Pethak, Stola/Logo/Symbol : Polos)

1. **Pacawisan** : Imam mimpin pandonga ing konsistori
2. **Liturgos** :

Sakderengipun pangibadah, Liturgos nyumet 1 (satunggal) lilin pethak ibadah.

Liturgos : “Pasamuwan kinasih kagunganipun Gusti Yesus Kristus, Pradataning Pasamuwan GKJ Ambarrukma ngaturaken sugeng rawuh, sugeng enjang, lan sugeng pepanggihan malih wonten ing pangibadah **Minggu Gangsal Welas Februari Kalih Ewu Nemlikur** (15 Februari 2026).

Sumangga kita sami atur uluk salam namaste utawi kanthi jawat asta kagem pasamuwan ing sakiwa tengen, ngajeng, saha wingking panjenengan. Berkah kabingahan, karaharjan, saha tentrem rahayu tansah nyarengi kita sami.

Kula nyuwun kawigatosanipun sawetawis, awit wontenipun pawartos Minggu menika, ingkang badhé kula aturaken sapérangan (*maosaken pawartos*).

Jangkeping pawartos saged kawaos lumantar pawartos *online* ingkang saged dipun undhuh mawi *QR code* ingkang sampun kacawisaken wonten ing layar monitor, punapa ingkang sampun kacawisaken wonten grup Whatsapp, menapa déné lumantar iber-iber cetak ingkang kacawisaken wonten ing kori greja.

Pasamuwan ingkang dipun kasihi dening Gusti, pangibadah wekdal punika kanthi irah-irahan **“Kajumbuhaken Wonten ing Kamulyan Dalem Gusti”** badhe kaladosaken dening Bapa Pandhita Martana Pancahadi.

Sumangga kita puji asmanipun Gusti kanthi repening kidung pambuka **“Pasamuwan Nyawiji” (Ladrang Laras Pelog Pathet Barang)** *kairing dening karawitan Kalvari Adi.....pasamuwan kasuwun jumeneng*

- (1) Pasamuwan kang nyawiji netepi sabdaning Gusti,
Dadya paseksi nyata Yesus yeku Sang Pamarta,
Sih rahmating Allah tumrah mring gung manungsa,
Sumrambah salir tyang kang pracaya, basuki gesangira.
- (2) Pindha badan mung sajuga nging kathah peranganira,
Pasamuwan kang manunggal mbabarken gesang kang enggal,
Sami dene mbiyantoni wit sih-sinihan sayekti,
Tunggal ati tunggal Gusti, nengsemken mring sesami.

(Kidung kawiwitan, Imam lan Pengkhotbah lumebet dhumateng altar, Imam ngaturaken Kitab Suci dhumateng Pengkhotbah, sakderengipun Pengkhotbah mapan dhateng mimbar)

3. **Votum tuwin Salam Karaharjan:** *(Pasamuwan Jumeneng)*

Pandhita : Pasamuwan kinasih, sumangga ing pangibadah dinten Minggu punika kita sesarengan mratelakaken pangaken konjuk Gusti ingkang mekaten:

Sadaya : **Pitulungan kita punika pinangkanipun saking Sang Yehuwa ingkang nitahaken langit lan bumi, tuwin ingkang mboten nate nilaraken pakaryaning Astanipun.**

Pandhita : Sih rahmat lan tentrem rahayu saking Sang Yehuwa Gusti kita, tuwin Gusti Yesus wonten ing bapak, ibu, sadherek lan lare-lare sadaya.

Pasamuwan : **Mekaten ugi ing panjenengan.**

Sadaya :

Buka Demung: 7 6

. . 7 6 . . 6 7 5 . 5 6 5 3 ②
A – min A - min A - min.

(Liturgos: Pasamuwan kula aturi lenggah.....)

4. **Sabda Introitus**

Lektor : Introitus kapethik saking: **Pagentasan 24 : 12 - 18**

Lektor : “Mekaten sabdanipun Gusti”

Pasamuwan :

Demung : 6 1 2 3 6 1 2 3 6 5 3 ②

Sedaya : Pu – ji so – kur konjuk Gus – ti.

5. **Liturgos :** “Pasamuwan ing tetunggalipun Gusti Yesus. Gusti Allah paring pangandika bilih para ratu badhe ngunjukaken kurmat, tuwin para panggageng badhe sujud manembah awit Gusti Allah ingkang setya sarta Kang Mahasuci, Gusti Allahi pun Israel, sampun milih sira. Sesarengan kita repenaken kidung pepujen, **“Pinujia Sang Kristus”** **(Lancaran Laras Pelog Pathet Lima)**

(1) Pinujia Sang Kristus, pinujia Asmane
Luhur, mulya ing ngaluhur
Pinujia Asmane, langgeng salaminya.

(2) Pinuji Gusti Yesus, pinuji salaminya
Luhur, mulya ing ngaluhur
Mbirat dosa umate, puji salaminya.

6. Pendeta : Sabda Andharaning Katresnan (Mulad Sarira) : Yesaya 1 : 18

"Ayo, kita padha prakaran! -- mangkono pangandikane Sang Yehuwah -- Sanadyan dosanira abang kaya gluga, bakal dadi putih kaya salju; sanadyan rupane abang kaya jarit sumba bakal padha dadi putih kaya wulu wedhus gembel."

7. Pacawisan Pamratobat

Imam : "Pasamuwan kagunganipun Gusti. Gusti Allah Sang Rama sampun mbirat saha nucekaken sakathahing dosa kita.

Pramila sumangga sesarengan kita badhe nyawisaken manah, murwakani pandonga pamratobat, kanthi memuji kidung **"Aku Wong Kang Dosa" (Ketawang Laras Pelog Pathet Nem)**

- (1) Aku wong kang dosa, ngungsi maring Gusti,
temahan den sucekna, srana rahe kang suci.
Sang Kristus Gusti, Panebus yekti.
Nadyan dosaku agung, nging Gusti wus nglebur.
- (2) Dhuh Gusti Pamarta, mung kwasa Paduka
ing kang saged ngluwari kawula saking dosa.
Sang Kristus Gusti, Panebus yekti.
Nadyan dosaku agung, nging Gusti wus nglebur.

8. Pandonga Pamratobat

Imam : "Pasamuwan ing kang sampun dipun tunggil ing padalemanipun Gusti, sesarengan kita aturaken pandonga pamratobat, kita ndedonga:

"Puji panuwun sokur kawula unjukaken ing ngarsa Paduka Gusti. Paduka Gusti, ing kang nitahaken jagat raya tuwin sak isinipun. Sih kamulyan saha kamirahan Paduka tansah kababar ing gesang kawula. Ing pangibadah enjang menika, kanthi raos keduwung awit nelangsani pandamel dosa kawula, kawula sowan ing ngarsa Paduka. Gusti, kawula ngungsi ing Paduka Gusti. Kawula nyuwun piwelas saha kamirahan Paduka. Paduka nucekaken kawula saking sedaya pandamel dosa kawula menika. Nyuwun pitulungan saha pepadhang ing Roh Suci nuntun lampah gesang kawula. Mugi berkah pepadhang sih katresnan saha kamirahan saking Paduka saget kawula lajengaken ing sak uruting gesang kawula. Linambaran sih katresnan saha rah kurbanipun Gusti Yesus Kristus Panebus yekti, kawula ndedonga. Amin."

9. Pandhita : Pawartos Sih-Rahmat : Jabur 84 : 12

"Amarga Pangeran Yehuwah Allah iku dadi sesurya lan tetameng; Panjenengane maringi sih lan kamulyan; wong kang lakune tanpa cacad ora dicukengi ing bab samubarang kang becik."

Pandhita : Pangatag-atag Gesang Anyar : Rum 12 : 2

“Lan kowe aja madha rupa kaya jagad iki, nanging padha salina marga saka budimu kaanyarake, satemah kowe bisa niteni apa kang dadi karsane Gusti Allah, apa kang becik, kang ndadekake keparenge Gusti Allah lan kang sampurna.”

10. Kidung Kasanggeman

Liturgos : “Pasamuwan kagunganipun Gusti. Gusti Allah kita menika dados sesurya saha tetameng kita, pramila kita gesang miturut karsanipun Gusti lan dados keparengipun Gusti. Sumangga sesarengan kita ugemi pangandikanipun Gusti lumantar pepujen kidung **“Sekar Panggunggung” (Lancaran Laras Pelog Pathet Barang)** *kakidungaken kaping kalih lan pasamuwan kula aturi jumeneng*

Bungahe kabeh mitra anglembana
Amarga winulang sakehing kayekten
Kwasane linuwih agung kadamane
Datan liya Gusti Yesus Putreng Allah yekti
Amung sih katresnan sesamining bangsa.

(Liturgos : *Pasamuwan kula aturi lenggah.....*)

11. Wedharing Sabdanipun Gusti

(*Pasamuwan Lenggah*)

a) Pandhita : Pandonga Epiklese

b) Pandhita : maosaken **Mateus 17 : 1 - 9**

c) Pandhita : Rahayu saben tiyang ingkang mirengaken sabdanipun Gusti lan nindhakaken karsanipun Gusti ing gesang padintenan. Halleluya.

Pasamuwan:	<i>Buka Demung</i>	. . 2 3 2 7 2 3
	. . 2 3 2 7 2 3	. . 2 3 2 7 2 3
	Hale-luya Amin	Hale-luya Amin
	. . 2 3 5 6 7 6	. . 5 7 6 5 6 5
	Hale-luya Amin	Hale-luya Amin

d) Pandhita : Paladosan Khotbah

e) Irah-irahan : **“Kajumbuhaken Wonten ing Kamulyan Dalem Gusti”**

f) Ancas : Pasamuwan dipun ajak supados saget jumbuh wonten ing kamulyan Dalem Gusti.

12. Pisungsung

Imam : “Pasamuwan ingkang linuber berkah ing Sang Kristus Gusti. Kamirahan saha berkahipun Gusti tansah linuber lumintu ing gesang kita sami. Pramila minangka cihnaning raos sokur kita dumateng Gusti, sesarengan kita badhe ngaturaken pisungsung ingkang sampun kita cawisaken.

Pisungsung wekdal menika kapantha dados tigang kanthong, kanthong setunggal kagem pasamuwan, kanthong kalih kagem kesaksian pelayanan, lan kanthong tiga kagem panyengkuyung dana griya éméritus. Pisungsung mirunggan saged dipun lebetaken ing kotak ingkang sampun kacawisaken.

Lan ingkang ngersakaken caos pisungsung kanthi migunakaken aplikasi m-banking, sumangga saged mawi scan kode QRIS ingkang sampun cumawis, katèmpèl wonten palenggahan.

Tetales pisungsung kapethik saking kitab **Saetunggal Babad bab Nembelas ayat Sangalikur (1 Babad 16 : 29)** ingkang mekaten suraosipun:

“Padha nyaosna kamulyaning asmane marang Pangeran Yehuwah, nggawaa pisungsung lan lumebua sowan marang ing ngarsane. Padha sujud lan nyembaha marang Pangeran Yehuwah kalawan ngrasuk kasucen.”

Kita aturaken pisungsung wonten ngarsanipun Gusti, kanthi repening pepujen **“Kula Suka Pisungsung” (Lancaran Laras Pelog Pathet Nem)**

- (1) Kula suka pisungsung dhateng tyang kang kesrakat
Amrih Gusti kang pinuji dening tyang ing donya.
- (2) Ugi kagem Gusti kawula caos pisungsung
Tangan kering tan tumingal lampahnya kang kanan.
- (3) Warandha miskin ugi nyaosaken pisungsung
Malah langkung kathah tinimbang tyang ingkang sugih.

13. Pandhita : Pandonga Syukur lan Syafaat

14. **Liturgos** : “Bapak, Ibu, lan Sedhèrèk kinasih ing Gusti Yesus Kristus, sumangga sesarengan kaliyan tiyang pitados ing pundi-pundi papan, kita sami nélakaken **Pangaken Pitados Rasuli**. Pasamuwan kula suwun jumeneng

- Kawula pitados dhateng Allah Sang Rama, ingkang Mahakawasa, ingkang nitahaken langit kaliyan bumi.
- Inggih pitados dhateng Yesus Kristus ingkang Putra ontang-anting, Gusti kawula.
- Inggih kabobotaken dening Roh Suci, miyos saking prawan Maryam.
- Inggih nandhang sangsara nalika jumenengipun Pontius Pilatus, kasalib, nglampahi seda, lajeng kasarekaken, tumedhak dhateng ing teleng palimengan.
- Ing tigang dintenipun wungu malih saking antawisipun tiyang pejah.
- Lajeng sumengka dhateng ing swarga, pinarak wonten ing tengenipun Allah Sang Rama ingkang mahakawasa,
- Saking ngriku inggih badhe rawuhipun ngadili tiyang ingkang gesang kaliyan ingkang pejah.

- Kawula pitados dhateng Roh Suci.
- Kawula pitados wontenipun pasamuwan Kristen satunggal ingkang suci sarta wradin, inggih patunggilanipun para suci.
- Punapa-dene pangapuntening dosa.
- Tanginipun raga.
- Sarta gesang langgeng.

15. Pandhita : Paladosan Berkah

- 16. Liturgos :** “Pradataning Pasamuwan ngaturaken panuwun awit peladosanipun Bapa Pandhita Martana Pancahadi lan sadaya paraga ingkang sampun nyengkuyung lampahing pangibadah Minggu punika, ugi pasamuwan ingkang rawuh lan nderek ing pangibadah.

Pasamuwan ingkang dipun tresnani Gusti, sumangga kita tansah mbudidaya supados saget jumbuh wonten ing kamulyan Dalem Gusti.

Sesarengan kita pungkasi pangibadah punika kanthi repening kidung **“Bingah” (Lancaran Laras Pelog Pathet Nem) kakidungaken kaping tiga**

Ayo suka pra kanca padha suka
 Gusti nganthi pra jalmi kang piniji
 Nyebar warta sami bingah
 Kang cidra ditilarna duraka dilalekna
 Temah nampi gesang yekti.

- 17. Liturgos :** “Mekaten lampahing pangibadah ing enjang menika sampun paripurna. Sugeng dinten Minggu, sugeng kondur, Gusti tansah paring berkah tumrap sedaya.”